

獻縣志

獻縣志卷十一下上

文獻志三

人物篇三之四下上

列女傳

人之福命以遇變而消而榮名則以遇變而顯男子或不盡然而女子則未有不然者故女子恆湮沒於處常而彰聞於處變嘗考列女之紀昉自劉向載之國史則肇自范書綜其所紀固不獨取貞節故范書不遺蔡琰而隋書且首以蘭陵公主自劉知幾紀曉嵐二氏先後掇擊之而後之爲方志者始趨重貞節矣新說勃興決裂閑檢擯貞節於道德之外溷淫佚於生理之中趨時婦女蓋聞而樂之豈知古聖人之制禮必使女子從一而終者乃根於生理

之不可或移而非以至難者責諸女子也茲志一秉古訓
其或德容言功有一長可取者亦間錄之要之以德爲主
事蹟可紀則傳以著之無可紀則畧以顯之有明以前祇
得許古妻劉氏一人其他不少概見故斷自明始一仍詳
近畧遠之舊云

孝婦八人 清韓守立妻俞氏夫妻皆至孝鄉里無間言
守立痛母喪明百治不愈大母復喪明聞人言割肉然
燈有效欲試之以力作養親未果氏請以代晨起叩天
默禱割右股肉寘諸盂爇以火炊爨如平時伯姑見之
亟滅火視創處無血痕氏曰兒肉已割矣幸爲然之冀

有效不然兒徒苦也伯姑火之不能然氏自然肉乃燼
大母兩目果霍然復明里人驚爲神告於邑令萬廷蘭
往驗之信喟然曰可謂至誠能動矣 湖廣遊擊牛璦
妻安氏事翁姑以孝聞姑歿翁年方五十以子女故不
欲繼室婦體翁意鬻簪珥衣飾得百金爲置簪室婦奩
資故豐以奉親故典鬻之無吝色旣盡紡織以佐不給
姑之歿婦泣涕成疾茹素逾三年三年之外每言姑必
泣下姑遺女四歲猶食乳婦奪子佐乳乳之常抱小姑
而攜己子小叔年十五飲食衣履皆婦身親及叔與小
姑長娶嫁之事竭力辦之未嘗有德色其乳小姑也翁

嘗咏之曰邱嫂一如慈母惠乳姑不異哺兒勤其撫小叔也翁又咏之曰晨昏依嫂側句讀侍兄前婦之舅氏張曜亦爲作孝行歌其見稱於內外如此 劉文顯妻趙氏翁沒事姑至孝姑有疾醫云非參無效姑以家貧故不肯服且云苟市參雖死不服氏自鬻衣物得參密煎進之不令姑知姑病已年餘氏晝夜起卧牀下至是漸瘥氏遂禱於神願終身茹素後數年姑卒氏亦隨逝里舉其孝縣令旌之 王香妻孫氏性至孝而香至暴家至貧每當艱窘輒躁怒氏婉勸之則詈氏而詈則辱氏母漸習爲常雖弗勸亦詈也氏心痛焉而事姑益勤

姑常怒香曰婦孝爾母如是爾詈其母忍耶姑病思肉香適空乏氏欲言恐觸香怒不言則姑太息謂將死不能嘗一嚮乃刲己肱不入齧而割之爲食進姑姑食之而病良已詎曰豈吾孝婦肉也氏諱之姑使香強視之見創香大感動遂敬氏終身不復詈 崔大舉妻郝氏

事姑至孝姑病甚百計治之不得痊姑昏憤中作譖語言非食人肉不能起矣氏信之遽割股烹以進姑食之竟愈 賈常德妻張氏年十七歸德德不才家貧親老置不顧氏日負薪采野蔬夜績以養貲偶羸輒沽酒市脯奉舅姑已常啖糠覈怡然無怨色 陳孝婦縣東北

傳家莊農家女適十五級陳廣武仲子清潤夫兄清源
在京供內差夫奉姑往省焉獨婦侍翁家居時翁治新
第方竣賊疑有鉅金夜糾十數人踰垣壞寢門入執翁
索金告以無賊不之信反接翁傾油於背而然之翁痛
呼號時婦方寢聞警急起披衣有嬰女方乳恐其啼因
抱諸懷及聞翁被灼抱女踉蹌趨救賊掣其肘猛標之
出數武外而仆女墮地大啼婦不顧卽起復救翁賊俯
拾小木凳擊之中鬢凳足入焉血涌如泉復仆又起奔
翁而伏其背賊復掣婦兩手抱持堅不可開賊怒挺
擊婦臂數十婦抵死不釋手賊乃捨翁盡搜括其所有

以去婦乘間撲滅火翁由是得免此光緒二十九年事

邑人倪
叔辰記

尹屯高占榮妻唐氏自歸占榮事翁姑以謹

飭聞占榮兄弟四人以居隘奉父命析著唐日必至翁
姑處候起居每嘗新或有異味翁姑弗先嘗不令子女
食也與翁姑言柔聲怡色無或違拘民國十三年患大
頭天行疾醫曰弗治一日若死恍惚至一官署見一貴
者方坐堂皇覩氏至謂侍吏曰此孝婦也胡爲乎來哉
速送之返驀然而醒則汗浹背矣竟以愈

孝女五人 清柳伏姐丁字樓民柳銘女銘無子乾隆六年病廢以無嗣爲恨伏姐年方十二毅然曰女不可代子乎又四年母王氏亦病皆貞疾不能起伏姐養親之志益決家貧薄田七八畝不足於食女晝自舂磨炊汲夜則紡績鬻以佐食得無匱旣長有議婚者女自卻之曰父母生我一人今老且病將事之終身無議此爲也或深言則厲色峻拒於是人不敢言最後父母並切諭且囑所親字之女聞呼天自誓竟不能奪其志女端莊溫靚不爲容飾寡言笑雖親戚之門皆不入依依父母側而已母病十七年卒能獨營其葬父卧牀二十一年

女奉之以終 陳一姑恂女也母病甚不能轉側仰臥
日久脊骨傷女以手藉之力弱受壓臂盡青不知痛楚
數月末嘗解衣卧飲食亦常忘之母歿晝夜哭歷四十
餘日以毀卒年僅十有四 吳孝女邑人吳士仁之女
也幼失怙鮮兄弟佐母紡織誓終養不嫁同治七年拾
賊北竄母方病鄰婦勸之行女曰有命在不懼也及賊
至覓利乃置袖中扶母出走遇二賊於途叱女返擠其
母於地將殺之女急呼曰不殺吾母當從汝返否則有
死而已賊曰諾女扶母歸置密室中出謂賊曰餓否吾
爲若炊炊訖使食時二賊各據一室一賊據牀卧一賊

出懷中酒飲之女乘隙繞至賊後刺其頸貫喉頃而仆
女佯作笑聲拔賊所佩刀直趨彼賊室賊方起立而刃
已洞其胸矣視賊俱死急出負母逃數日母愈 魏雲
姑儒家子也年十七從母攜妹行乞至武清之王慶垞
遇暴風死路側風息村人見女裸身死謂遇盜也及於
沙礫中出其母妹尸則女衣皆覆其上蓋欲救其母與
妹而自解者故雖死無戚容無塵垢其母與妹則泥沙
滿七竅矣村人哀之爲具衣市棺葬焉 賈孝女者中
王大賈永興之女永興無子女矢志不嫁父母婉勸之
乃斷髮自誓衣再浣食脫粟泊如也紡織外則誦佛經

自遣永興壽七十五妻某氏壽八十三皆女奉事以終
女六十六歲時光緒十二年鄉人爲之請旌榜其門曰
孺慕終身

烈女八人 明高二姐者單橋軍人高鑑女也許字邱氏
正德中爲賊所掠經邱氏圍以語給賊入圍縊樹下

清葛朴姐者孝舉村民陳天明後妻郝氏前夫女也年
十七鄰子王自銀逼汙不從以劍斷喉死乾隆八年置
自銀法旌女之門 宋二姑貧家女也雖寒苦頗嫻閨

訓居恒未嘗至衢巷里嫗皆嘖嘖稱之鄰有強暴子曰
劉三稔聞而慕之女父出耕母饑之女鍵戶獨績三踰
垣往挑之誘以財不顧露刃脅之不懼也三怒擢女髮
以刃承其喉曰不從我卽刻死矣女曰吾非下流人萬
不能爲下流事死乃命也遂被刺邑令李汝廉置三於

法爲請旌並徵詩詠其事刻石表女墓 高烈女其母

倡也女雖童稚恥其母所爲或與其母謀醉以酒而污

之女聞之遽自縊死年僅十有三 劉冬姑邑民清平

女也咸豐癸丑賊竄後軍卒過其家女入室閉戶下鍵

焉卒隔牖窺之誘以金女大哭握刃恐之女曰死固願

也卒怒操戈撞其扉堅不可破乃忿而去家人窺牖慰

之則已縊而死矣時年十有五 白氏女者父昌言杜

柯村生員也同治七年捻匪自臧家橋渡河北擾昌言

載家人於葱靈以逃其弟昌明之婦傅氏亦與焉至邊

馬橋賊十餘騎追至露刃脅女及傅上馬行女紿賊使

他顧乘機與傅躍入河賊相顧錯愕遂遁家人求之河
得女及傅尸面如生女年十六傅年三十二並入節烈
祠

此一事殊難割隸二目
謀出自女故以婦附女

郭老姐者商家林郭永康

妹也年十八同治七年捻匪之亂偕母避難於北宗村
朔晨賊猝至獲老姐賊所驅車先已載婦女七八人迫
老姐登老姐罵之賊怒倒戟擊老姐老姐罵如故賊乃
以刀斫其顱罵益厲凡七刀而殞 張氏女者河城人

軼其父名或訪者諱言之也幼字高馬頭村某氏子未
嫁而某氏子死女欲守貞父不欲陰使媒張某議婚於
堯京某氏屆期來迎女不登輿父怒毆之女大哭詈媒

父揚言以席捲而倒置之女乃食毒而丐人說其父死
則以尸歸高馬頭遂卒